


Deskobre Lalehan iha ó-nia laran

Fulan salezianu

Hotu ona feriadu eskola nian, Ita hahú fali atividade regular oratóriu nian ho fulan salezianu nian. Bainbain, iha fulan ida ne'e ita hala'o atividade barak hodi prepara an ba festa Laura Vicuña, s. Francisco de Sales no, liuliu, Dom Bosco.

Ita sei hahú hodi refilete kona-ba fatuk murak fiar nian: foin hotu tinan fiar nian, nune'e bele sai furak iha fulan ne'ebé ita selebra ita-nia santu salezianu sira, hateke ba sira husi pontu de vista fiar nian.

Ba fulan ida ne'e sei propoin atividade ida de'it tanba bainbain, iha ita-nia oratóriu sira iha ona programa barak ne'ebé liga ba parokia no ba festa sira ne'e



ATIVIDADE: Haree ho matan fiar nian



Dala barak ita moris hodi la komprende akontesimentu sira nia signifikadu. Propoin ba oratorianu sira atu kalan-kalan, molok toba, hodi halo ezame de konxiénsia sira bele koko atu komprende buat ne'ebé mosu loron ida ne'ebá nia signifikadu iha Maromak nia planu. Sira bele husu ba sira nia an: "Se Jezús iha ha'u-nia fatin karik? Nia sei halo sa loos?"



JOGU: Tiha ikan sira



Materiál: pinta ikan sira iha surat-tahan abu-abu (ka metan) no surat-tahan ho kór oinoin (mutin mós di'ak!) hodi fó ba kór ida-idak valór diferente: ez. ikan mean simu pedasu 1, ikan mutin simu pedasu 2 nst (metan la vale buat ida tanba ikan dodok). Presiza mós ai mop 3 / 4. Kadeira ka banku ruma atu kria "lutu".

Prepara fraze ida Dom Bosco nian ne'ebé tesi pedasu-pedasu.

Prepara "lutu" ida ho kadeira ka banku no soe ikan sira iha laran. Fahe oratorianu sira ba grupu no marka tempu (minutu 5) ba grupu ida-idak atu koko "tiha ikan". Liu tiha tempu ne'ebé fó ba grupu, animadór sei sura ikan ne'ebé sira tiha. Bainhira grupu hotu halimar ona bele "selu" grupu ida-idak ho pedasu fraze Dom Bosco nian hodi haree se mak siik fraze loos.




FILME



Filme "Giovanni, foin-sa'e mehi nian" apresenta Joanzinho Bosco nia esperiénsia to'o bainhira nia sai amlulik. Bainhira Dom Bosco sei ki'ik nia hetan susar no difikuldade barak ne'ebé filme hatudu didi'ak. Bele haree filme ida ne'e hodi husu ba oratorianu sira atu evidénsia:

- ♦ hahalok fiar nian ne'ebé Joanzinho hatudu
- ♦ se mak tulun Joanzinho atu fiar metin nafatin ba Maromak no oinsá tulun nia.





ISTÓRIA



Loron ida ema ida husu ba Maromak atu haraik ba nia aifunan ida no borboleta ida. Maibé Maromak haraik ba nia ular ida no ai-tahan ida ho ai-tarak barak. Ema neon kraik teb-tebes tanba nia la komprende oinsá Maromak bele sala; fofoun hanoin atu husu fila fali buat ne'ebé nia hakarak, maibé depois nia hanoin katak iha ema barak ne'ebé presiza buat ne'ebé importante liu ninian no mós nia fiar katak Maromak hatene buat ne'ebé Nia halo.

Liu tiha fulan ruma, katuas ida ne'e hanoin fali ba buat ne'ebé nia husu ba Maromak no nia ba buka Na'i nia prezente ne'ebé rai iha kuartu ida. Bainhira nia tama, nia hakfodak hodi haree katak husi ai-tahan ho ai-tarak mosu aifunan furak ida ho kór nabilan, no ular la iha ona, maibé halo moris borboleta ida.

Maromak hatene ita-nia dalan no ita-nia presiza; bainhira ita hanoin katak buat hotu la loos, no Maromak la haraik mai ita buat ne'ebé ita husu, keta ta'uk, Maromak hatene atu fó mai ita buat ne'ebé ita presiza iha momentu los. Nia la sala bainhira haraik buat ruma... ba oin ho fiar boot!



SANTU SALEZIANU: Dom Bosco no fiar



Bainhira Dom Bosco katuas ona, Amo Papa Leone XIII husu ba nia atu toma konta ba Kreda "Sagrado Coração" ne'ebé hahú hari'i iha Roma, maibé la hotu. Amo Papa hatene katak Dom Bosco nia fiar ba Maromak nia Providénsia bele halo milagre. De faktu, osan ne'ebé gasta ba Uma Kreda ida ne'e barak tebes no loron ida nia simu informasaun katak tuku 17 insenieru konstrusaun nian sei mai atu simu liras 15.000, maibé tuku 16 Dom Bosco nia gaveta sei mamuk hela. Tuku 16.30 amlulik ida dere odamatan no lori envelope ida. Nia esplika katak hodi kontrola ninia gastu, nia rai osan 8.000 ne'ebé amlulik hanoin atu fó ba Dom Bosco bainhira nia mate. Nia kolega ida halo hanesan hodi rai liras 7.000. Maibé, Iron ida ne'ebá sira hasoru malu hodi fó hatene ba malu osan ne'ebé sira konsege atu rai; teki-teki sira hakotu katak di'ak liu fó kedas osan hirak ne'e ba Dom Bosco, duke hein tan. Nune'e amlulik apresenta an ba Dom Bosco ho liras 15.000; nia sei ko'alia daudaun, bainhira insenieru to'o atu husu ninia osan. Dom Bosco husu ba amlulik ida ne'e atu haktuir ba insenieru ninia istória, hafoin sira na'in tolu hamutuk, agradese Na'i ba ninia laran luak.



ORASAUN



Iha Quelicai, animadór sira husu atu, fulan-fulan, bele celebra Missa no Konfesa hamutuk ho oratorianu sira.

Animadór sira bele hato'o proposta ida ne'e iha sira nia oratorio, no conforme disponibilidade amlulik sira nian, bele hala'o.

Atu favorese katak bele prepara didi'ak ba sakramentu Konfisaun nian, tempu ida-idak ami sei hato'o selebrasaun penitensiál ida ne'ebé tuir topiku tempu ida-idak nian.

Ba fulan ida ne'e, ami sei haruka selebrasaun penitensiál ida kona-ba fiar.